



RESOLUCIÓN DO 3 DE ABRIL DE 2018, DA XEFATURA TERRITORIAL DA CONSELLERÍA DO MAR EN VIGO, POLA QUE SE CONVOCA O PROCESO SELECTIVO PARA O OUTORGAMENTO DA MODALIDADE DE PERCEBE AO ABEIRO DO PLAN DE EXPLOTACIÓN PARA O RECURSO ESPECÍFICO DENDE EMBARCACIÓN, DA CONFRARÍA DE PESCADORES DA GUARDA APROBADO PARA O ANO 2018.

ANTECEDENTES

1. A Orde do 22 de decembro de 2017, pola que se aproban os plans de xestión para recursos específicos en Galicia para o ano 2018 aproba o plan de xestión para o recurso específico de percebe dende embarcación, da Confraría de Pescadores da Guarda, que inclúe a incorporación de cinco (5) embarcacións cunha (1) habilitación cada unha e cinco (5) embarcacións con dúas (2) habilitacións cada unha.

2. O 2 de marzo de 2018, a Confraría de Pescadores da Guarda presenta un escrito no que solicita o inicio do proceso selectivo para o outorgamento da modalidade, de conformidade co aprobado no plan de xestión.

CONSIDERACIÓNS LEGAIS E TÉCNICAS

1. A Lei 11/2008, do 3 de decembro, de pesca de Galicia, modificada pola Lei 6/2009, do 11 de decembro, entre outros requisitos establece no artigo 42.1:

"A explotación das distintas especies de recursos específicos realizarase por modalidades. Esta requirirá estar en posesión das correspondentes habilitacións previstas no artigo 39º desta lei e participar nun plan de xestión.

2. O Decreto 425/1993, do 17 de decembro, polo que se refunde a normativa vixente sobre o permiso de explotación para exercer-la actividade pesqueira e marisqueira, entre outros requisitos no artigo 4º establece:

"O permiso de explotación non poderá ser outorgado, revalidado nin transmitido a aquelas persoas físicas ou xurídicas que teñan sanción firme en vía administrativa en materia de protección de recursos mariños, pendente de pagamento."

3. O Decreto 15/2011, do 28 de xaneiro, polo que se regulan as artes, aparellos, útiles, equipamentos e técnicas permitidas para a extracción profesional dos recursos mariños vivos en augas da competencia da Comunidade Autónoma de Galicia, entre outros requisitos establece:

- En ningún caso, poderán exercer actividades de pesca as embarcacións que non dispoñan de medios mecánicos de propulsión (artigo 6.6).



- As embarcacións que poden optar a incorporar no seu permiso de explotación a modalidade de percebe deberán ter menos de 3 TRB ou menos de 2,6 GT (artigo 159).

4. A Orde do 30 de decembro de 2015 pola que se regula a explotación dos recursos específicos no ámbito da comunidade Autónoma de Galicia, na sección 1ª artigo 25.2 determina que:

"Ser armador/a dunha embarcación que teña algunha modalidade de recursos específicos no seu permiso de explotación é incompatible con ser titular dun permiso de explotación a pé para recursos específicos. As persoas titulares dun permiso de explotación a pé para recursos específicos poderán presentarse ao proceso selectivo para obter as modalidades desde embarcación para este tipo de recursos, pero renunciarán ao dito permiso no momento da obtención dalgunha delas."

5. A Orde do 30 de decembro de 2015 determina nos seus artigos 26 a 30, o procedemento para a obtención da modalidade de recursos específicos no permiso de explotación da embarcación.

6. Todas as solicitudes que cumpran os requisitos sinalados nesta resolución serán valoradas de acordo co baremo aprobado pola Resolución do 4 de maio de 2016, da Dirección Xeral de Desenvolvemento Pesqueiro pola que se aproba o baremo para acceder ás modalidades de recursos específicos no permiso de explotación das embarcacións, así como para elaborar as listas e actualizar os méritos para o incremento do número de cotas de captura para as embarcacións incluídas nun plan de xestión de recursos específicos e que figura como anexo B desta resolución.

O catálogo de actividades formativas recoñecidas como mérito para o baremo de acceso ás modalidades de recursos específicos no permiso de explotación das embarcacións (Resolución do 16/03/2018 da D.X. de Desenvolvemento Pesqueiro) que figura como anexo C desta resolución.

7. Esta xefatura territorial é o órgano competente para o outorgamento da modalidade de recursos específicos no permiso de explotación da embarcación de conformidade co establecido no artigo 52 da Orde do 30 de decembro de 2015, pola que se regula a explotación dos recursos específicos no ámbito da Comunidade Autónoma de Galicia. De acordo con todo o anterior,

RESOLVO:

Convocar o proceso selectivo para o outorgamento da modalidade de percebe a cinco (5) embarcacións cunha (1) habilitación cada unha e cinco (5) embarcacións con dúas (2) habilitacións cada unha, para o exercicio da actividade extractiva no ámbito da Confraría de pescadores da Guarda, con suxeición ás bases da convocatoria recollidas no anexo A.



Contra esta resolución, que non pon fin á vía administrativa, poderá interpoñer recurso de alzada ante a conselleira do Mar no prazo dun (1) mes, que se contará a partir do día seguinte ao da notificación desta resolución, de acordo co establecido nos artigos 121 e 122 e seguintes da Lei 39/2015, do 1 de outubro, do Procedemento Administrativo Común das Administracións Públicas (BOE núm. 236, do 2 de outubro de 2015).

Vigo, 3 de abril de 2018

Axefa territorial

Sonia Lorenzo Santos



